

Noticia Social.....

Hubileo di Oro di Pader Wijbe Fransen

Diarazon 23 di Juli Pader Wijbe Fransen ta celebra su hubileo di oro como religioso.

Despues cu el'a ordena como sacerdote, Pader Wijbe Fransen a traha un aña na Corsou, dos aña na Bonaire y 41 aña na Aruba.

El'a traha den diferente parokia na Aruba manera Santa Cruz, Oranjestad y Dakota.

Na aña 1990 Pader Wijbe Fransen hunto cu Pader Jaq van der Lee y Pader Jan Bouman a bay traha na Centro Pastoral Aruba, situa den ex convento di soeurnan na Santa Cruz.

Aki hunto cu grupo di laiconan nan a traha specialmente riba e formacion spiritual den comunidad Arubano pa medio di programanan pa hoben, adulto, preparacion pa matrimonio, curso di Bijbel, liturgia etc. Por menciona otro programanan manera Renobacion Carismatico, Scol di Evangelizacion, Legion di Maria, programa pa school, programa pa presonan.

Pader Wijbe Fransen ta bini di e Orden di San Dominico, esaki ta significa cu e tarea principal ta plama e palabra di Cristo bao di tur nacion y traha na formacion spiritual di cada individuo.

Pader Fransen tabata hopi involvi tambe den proyectonan social pa comunidad manera SAMBA pa yuda esnan adicto na alcohol y fundacion Osticeba pa desaroya actividadnan

social den bario.

Como miembro di clero Catolico na Aruba, e padernan na Centro Pastoral na varios ocasion a laga nan voz resona den comunidad. Especialmente den temporada di eleccion.

Ta referi no solamente na e violacion fisico cu sa tuma lugar den comunidad, pero tambe e violacion verbal, unda hende ta ofende otro cu palabra sea skirbi of papia.

Pader Fransen tambe a forma parti di diferente comision nacional ora ta trata di prevencion y combati criminalidad y bienestar social pa esnan den necesidad.


Tambe a funda e boletin Catolico "E Noticia" cu ta relata sucesonan di Iglesia, formacion spiritual y e doctrina social di Iglesia.

Na 2005 hunto cu SKOA, Pader Fransen tabata e motor pa organiza e curso di Duc in Altum, pa formacion di lidernan Catolico pa haci trabao pastoral hubenil tanto na school como den parokia.

Un total di 40 persona a gradua y un grupo grandi di e graduadonan a sigui despues un curso di pedagogia pa despues baytrahadenenseñanza.

Cu e proyecto aki Pader Fransen a yuda forma trahadornan pa sigui traha den e cunucu di Señor.

Na aña 2009 Pader Fransen a repatria pa Hulanda, pero manera e mes a expresa e tempo ey: "Cu hopi



preocupacion pa cierto desaroyonan na Aruba, manera famianan desintegra, adiccion di alcohol y droga y e falta pa construi un comunidad sano y honesto cu ta pidi pa un cambio di mentalidad y un bida mas autentico segun balornan di Evangelio". Pader Fransen ta biba na Zwolle y ta yuda entro otro cu e guia spiritual di Arubiano y Antianonan na Zwolle y Groningen.

E celebracion di e hubileo di oro di Pader Wijbe Fransen ta tuma lugar diadomingo 3 di Augustus pa 10 or di mainta na Sint Thomas van Aquinokerk na Zwolle, adres

Assendorperstraat 29, 8012 DE, Zwolle.

Un invitacion special pa tur Arubiano y Antianan na Hulanda pa asisti na e celebracion aki pa muestra nan aprecio y gratitud pa e bunita trabao cu Padernan di Orden di San Dominico a haci na Aruba.

Pabien Pader Fransen y cu papa Dios duna Bo hopi aña mas di bida y salud pa sigui traha na e formacion spiritual di hoben y adultonan na Hulanda, specialmente esnan di Aruba, Corsou, Bonaire y Islariba.